

LEWALITABA

Leselinyana la Lekhotla la Taolo ea Motlakase le Metsi Lesotho

TSE KA SEHLOOHONG:
Lintlha tsa phano ea
boleng ba litšebeletso
limmokeneng tsa sechaba 8



KA KHATISONG ENA...

5 'Moka oa bo 15
oa RERA o tsoela pele

8 Lintlha tsa phano ea
boleng ba litsebeletso
limmokeneng tsa sechaba

12 Thuto ka tsa phepele
ea motlakase metseng

WWW.LEWA.ORG.LS

U na le thahasello ea **ho tseba haholo ka** **Lekhotla la Taolo ea Motlakase le Metsi Lesotho?**



Ho fumana tlhakisetso e felletseng, ikopanye le rona: 7th Floor, Moposo House, Kingsway, Maseru, Lesotho

Tel: +266 22 312479 • Fax: +266 22 315094 • Email: secretary@lewa.org.ls





LEWALITABA

LEKHOTLA
LA TAOLO EA
MOTLAKASE LE METSI

7 Floor, Moposo House, Kingsway
Private Bag A315 • Maseru
Maseru • Lesotho
Tel: +266 22312479
Fax: +266 22315094
E-mail: secretary@lewa.org.ls
Website: www.lewa.org.ls

MOOKAMELI
Lebohang K. Moleko
Email: lmoleko@lewa.org.ls

MOOKAMELI OA LEFAPHA LA
LITABA TSA SECHABA
Shao Khatala
Email: skhatala@lewa.org.ls

OFISIRI EA LITABA TSA SECHABA
Sebusi Khanyela
Email: skhanyela@lewa.org.ls

LEWA LITABA ke leselinyana la Lekhotla
la Taolo ea Motlakase le Metsi. Le
hatisoa ka Senyesemane le Sesotho. Le
fuo batho bohle ba nang le thahasello
litabeng tsa Lekhotla.

Maikutlo a hlahang leselinyaneng ha
se a Lekhotla. Lipapatso tse hlahang
ka ho lona ha se tse supang maikutlo
a Lekhotla.

Litaba tse hlahang ka ho lona li ka
hatisoa ntle le tefello ha feela ho
ngoloa hore li tsoa ho LEWA LITABA.
Re ipiletsa hore batho ba elelloe hore
ho nka nakoana ho etsetsa, ho tlosa
le ho etsa liphetofo lethathamong la
batho ba fumanang LEWA LITABA.

Boqapi © LEWALITABA 2018

TSE KA HARE

TSE KA HARE

MOLAETSA

ka Mookameli 2

WSUP, ESAWAS LI TEKENELA TUMELLANO

ea phano ea litšebeliso ho mafutsana literopong 3

'MOKA OA ESAWAS

o thakholoa Rwanda 4

'MOKA OA BO 15 OA RERA

o tsoela pele 5

TATAISO MABAPI LE HO AHA HAUFU

le thepa ea metsi le motlakase 6

LEWA E ABELA BAITHUTI BA IPABOTSENG

ba NUL le Lerotholi Polytechnic likhau 7

LINTLHA TSA PHANO EA BOLENG BA

litšebeliso limmoking tsa sechaba 8

METHATI E LATELOANG KE LEWA

ho rarolla litletlebo 10

SEABO SA LEWA LEANONG LA NAHA

la tsa metsi le likhoerekhoere 11

THUTO KA TSA PHEPELO

ea motlakase metseng 12

LEWA E KETEKELA

matsatsi a Keresemese 13



Babali ba khabane,

Ke lebohe ha ele mona ke boetse ke hlahisa leselinyana lena le hlahosang tse ling tsa lietsahala tsa likhoeli tsa Mphalane - Tšitoe 2018 tsa Lekhotla la Taolo ea Motlakase le Metsi Lesotho (LEWA). Leselinyana le fa babali tlhahiso-leseling ka litaba tsa kamehla le mehla e le hona ho ikamahanya le maemo a joale a bosebeletsi bo tsoileng matsoho.

Re qala litaba tsa leselinyana lena ka ho sheba lintlha-kholo tsa liketsahalo moo LEWA e nkileng karolo libokeng tsa 'Mamekhatlo' oa Mekhatlo ea Motlakase le metsi e leng Regional Electricity Regulators Association of Southern Africa (RERA) le East and Southern African Waters Regulators Association (ESAWAS) ka tatellano. LEWA ke setho sa RERA le ESAWAS.

Molaetsa ka Mookameli

Lintlha tsa bohlokoa holim'a meoloane ea tšireletso le polokeho khahlanong le ho aha pela thepa ea metsi le motlakase li manollotsoe. Lietsahala tsa moo Lekhotla le neng le abela baithuti ba ipabotseng lithutong tsa bona ba Sekolong se Seholo sa Sechaba (NUL) hammoho le sa Lerotholi Polytechnic (LP) li a tlalehoa.

Taba e 'ngoe ke mekhoha eo basebelisi ba litšebeliso tsa metsi ba ka e latelang ho fumana le ho tlisa tharollo ka metsi a lutlang lipompong le lisebelisuo tse malapeng. E le ho nanabetsa letsoho tharollong ea litletlebo, leselinyana le thathamisa lintlha tse ileng tsa seka-sekoa liphuthehong tsa sechaba tse amanang le phano ea boleng ba litšebeliso lefapheng la metsi le motlakase literekeng sa Qacha's Nek le Thaba-Tseka. Ho boetse hape ho shejoa litaba tse amanang le maano a naha ea tsamaiso litabeng tsa metsi le likhoerekhoere hammoho le boithuto ba leano la Lefapha la Kanetso le Phepelo ea Motlakase Metseng ea Mahaeng (R.E.U), har'a tse ling □

Lebohang K. Moleko (Professor)
Mookameli



Bakeng sa lithakisetso mabapi le lingoloa tsa leselinyana lena, kapa tšebetso ea LEWA, letsetsa 22312479, kapa u romelle molaetsa ho secretary@lewa.org.ls



WSUP, ESAWAS li tekenela tumellano ea phano ea litšebeletso ho mafutsana literopong

Setsi se naheng ea United Kingdom se bitsoang Water and Sanitation for the Urban Poor (WSUP) le 'Mamekhatlo oa Makhotla a Taolo ea Metsi le Bohloeki Afrika Bochabela le Boroa (ESAWAS), li tekenetse tumellano ea tšebelisanomoho ho matlafatsa phano ea litšebeletso ho sechaba se futsanehileng metseng ea literopo, Rwanda-Nyamata, ka la 28 Pulungoana 2018.

Ho ea ka Dr. Baghi Baghirathan Mookameli oa WUSP lefapheng la tsa Bophelo le Bohloeki, ESAWAS le WUSP li na le maikemisetso a tsoanang a ho thusa litsi tsa metsi le bohloeki li be le boiphihlelo ka phano ea litšebeletso tsa moshoelella. Kaholima ho moo makhotla a taolo a tsoanela hore a etse hore a sebetse ka tsela e sehlahlo ho phethahatsa mosebetsi eo a e thehetsoeng linaheng ka ho fapana tsa ESAWAS.

"WSUP e ikemiselitse ho eketsa palo ea batho ba fumanang litšebeletso tse ntlafetseng tsa Metsi le bohloeki. Ka hoo, re motlotlo hore re kene selekaneng le ESAWAS," a rialo Dr. Baghi Baghirathan.

Selekane sa WSUP le ESAWAS se lebelletsoe hore se tla atlehisa mosebetsi oa makhotla a Taolo a litsi tsa metsi ho ipapisa le litsela le meetlo ea machaba ka ho thusa litsi tsa phano ea litšebeletso tsa metsi le bohloeki ho fana ka litšebeletso tse litheko li tlaase tsa maemo a holimo metseng ea literopo. Makhotla a taolo a na le seabo sa ho se phethahatsa e le ho fihlela Pehelo tsa Machaba tsa Moshoelella ea Botšelela (United Nation's Sustainable Development Goal 6 -(UN SDG 6)).

UN SDG 6 ke boitlamo ba machaba hore ka selemo sa 2030 baahi ba linaha tse ntseng li tsoela pele ba be ba fumantšitsoe phephelo ea metsi a hloekileng le matloana a boithuso a lokelang. Hona le lintlha tse robeli kahar'a tokomane ea UN e le tsona tse tla ba meoloane e fihleloang. Matšoao a 'maloa a tla sebelisoa ho lekola khatelo-pele e fihletsoeng ho phethahatsa SDG6 linaheng ka ho fapana.



Dr. Baghi Baghirathan, WSUP's Director of WASH.

Molula-setulo oa Komiti ea ESAWAS ea Litaba tsa Metsi le Bohloeki, Peter Njaggah, oa Boto ea Taolo ea Metsi le Bohloeki naheng ea Kenya (WASREB), o bontšitse hore ho bohlokoa hore litsi tsa phano ea litšebeletso tsa metsi le bohloeki le makhotla a taolo ea tsona li sebetse ka thata ho fihlela lipehelo tsa UN SDG 6.

"Ke bohlokoa hore UN SDG 6 e phethahatsoe haholoholo linaheng tsa Afrika tsa ka boroa ho Lehoatata la Sahara. Tšebelisanomoho ea ESAWAS le WSUP e tla thusa hore litsi tse lefapheng la metsi le bohloeki amehang li be matla ho phethahatsa mosebetsi oa tsona," Eng. Njaggah a eketsa joalo.

Nakong ea 'moka, LEWA e ile ea fana ka tlaleho ea hore litsi tse kholo tse laoloang li sebetse joang moralo oa selemo sa 2017/18, ho ipapisitsoe le lintlha tsa tsamaiso e ntle ea tšebetso, paballlo ea lisebelisoa tsa mosebetsi le boleng ba besebeletsi sechabeng.

Tlaleho e bontša hore papisong le litsi tse ling tsa ESAWAS setsi sa Lesotho e leng K'hamphani ea Metsi le Likhoerekhoere (WASCO) se bonahetse se ntse se tsoanela ho matlafatsa tšebetso hore e atamele ho ea litsi tse etsang mosebetsi oa eona tikolohong □

'Moka oa ESAWAS o thakholoa Rwanda

Mmoka oa bo 12 oa 'Mamekhatlo oa Makhotla a Taolo ea Metsi le Bohloeki Afrika Bochabela le Boroa kapa Eastern and Southern African Water and Sanitation Regulators Association (ESAWAS) ka Senyesemane, o neng o le holima 'moko-taba oa ho akofisa moralo oa taolo ea litšebeliso tsa metsi le bohloeki e le ho nanabetsa ho fanoa ha litšebeliso ho bohle, o ile oa tsoareloa Nyamata, Rwanda ka la 27-29 Pulungoana, 2018.

'Moka o neng o tsoeroe/hlophisoa ke Rwanda Utilities Regulatory Authority (RURA).

Sebaka sa Selemo sa ESAWAS se butsoe ke Molulasetulo oa ESAWAS Monghali Emilio Muchanga le Mookameli oa RURA Lt Col. Patrick Nyirishema. Puo ea mantlha e holim'a moko-taba o neng o baleha *'The Regulatory environment for accelerating access to WSS services with focus on sanitation and climate resilient systems: leaving no one behind'* ka Senyesemane o ile oa etsoa ke Dr Dennis Mwanza, Moetapele oa -E-Wash, Nigeria. Boraro ba libui tsena ba ile ba hatella ka matla hore bohle ba kenetseng 'moka ba nahane ka maoala a ka sebelisoang ho arabela mathata a tlhokahalo ea metsi le bohloeki nakong tsena tseo maemo a leholimo a fetohileng 'me liqholotso tsa teng li le ngata.

'Moka ona oa matsatsi a mabeli o ile oa sheba ka kotloloho liteko tse seng ntse li etsoa ke litsi tsa phano tsa litšebeliso, ho aha mekhoha ea ho eketsa bohloeki haholo matloana a bolokehileng, litsi tse ka

kenyang letsoho le mekhoha ea ho fumana chelate ea ho phethahatsa hore likhoekhoere tsa matlaoaana ao li ntšetsoe moo li sat lo baka mathata tikolohong. Ntlha e 'ngoe ebile ho busiana hore na se ka etsoang ke sefe ho boloka tikoloho le bohloeki matloaneng a se nang metsi nakong tsa phetoho ea leholimo. Bohle ba kenetseng mmoka ba bile ntsoe leng hore litaba tsa bohloeki li tsoanela li nkeloe holimo ke mafapha ohle a amehang e le ho etsa tharollo ea moshoelella e ka etsang hore le maemong a likhohola kapa lifefo matloana a se tsoelle litšila hohle tikolohong.

Phutheho ea Litho ea Selemo e entse qeto ea hore Boto ea Taolo ea Metsi le Bohloeki Burundi (AREEN) e be eona e tla tsoara seboka sa 2019 sa Selemo le Kopano e Akaretsang. LEWA e tla ba malala-a-laotsoe haeba AREEN e ka khitlela tabeng ena.

Ke batho ba fetang 80 ba neng ba emetse litsi tsa taolo ea metsi le bohloeki tsa linaha Zambia, Tanzania, Lesotho, Zanzibar le Mozambique ba bileng teng. Hape kahar'a bona ho bile teng Makala a laolang Metsi le Bohloeki a linaha tsa Uganda le Botswana.

Mekhatlo ea Water Services Association of Malawi, the Water and Sanitation for Urban Poor (WSUP) - UK; Sanergy-Kenya; Climate Resilience Infrastructure Development Facility (CRIDF) – Africa Boroa; litsi tse maloa tsa tikoloho ea ESAWAS (Lusaka WSC-Zambia, AdeM-Mozambique, DAWASA-Tanzania, Moshi-Tanzania le ZAWA-Zanzibar) □





'Moka oa bo 15 oa RERA o tsoela pele

Lekhotla la Taolo ea Motlakase le Metsi Lesotho (LEWA) ile ea e ba karolo ea 'Moka oa selemo oa bo 15 oa 'Mamekhatlo ea Makhotla a Tsamaiso ea Motlakase a Afrika e Boroa (RERA), tlasa 'moko taba: *Tsamaiso e matlafatsang pharalatso ea meralo ea matla ba keng la keketso e atlehileng le tšireletso ea phepelo*, se ne se tšoaretsoe Livingstone, Zambia ho tloha ka la 26 Pulungoana ho isa la 1 Tšitoe 2017.

Sepheo sa 'moka e ne e le ho neha balaoli, liqhoku tsa likhoebo le ntlafatso, baetsi ba maano, bahoebi le batseteli, hammoho le batho ba bang ba nang le thahasello litabeng tsa motlakase tikolohong ea Afrika e Boroa (SADC) le lefatše hore ba hokahane, ba thakelane ka malebela, litabeng tse amanang le 'maraka oa phepelo ea motlakase.

Puong ea hae ea mantlha Letona la Malawi la Matla,

Monghali Aggrey Masi, o ipilelitse ho bohle ho eketsa liteko tsa ho matlafatsa lefapha la matla la tikolohong ea SADC.

"Sepheo sa rona bohle ke ho bona hore Lefapha la Matla karolong ea ena ea Afrika e Boroa le tla le fana ka litšebeletso tse seng litjeo li boima, tse thusang batho, ka tsela ea moshoelella me ebile e le tsa sejoale-joale. Ke hona ho fihlela sena ho hloka hore bohle ba ikopananye ho aha litsi le lokelang melao le melaoana hammoho le maano a tla thusa tabeng ena.

LEWA e bile setho sa RERA ho tloha ka 2005.

Qetellong litho tsa RERA li lumellane hore MERA e be eona Molula-setulo oa RERA kamor'a hore Lekhotla la Zimbabwe la ZERA le theohe sa bolula-setulo. MERA e tla tlatsoa ke Lekhotla la Zambia la Matla e leng ERB □

**Motlakase
o kotsi ha
o sa sebelisoa
ka hloko!**



Ke 'nete hore **motlakase** o bohlokoa haholo maphelong a rona ka kakaretso. Ho tloha nakong eo re tsohang, ho fihlela ha re robala, re sebelisa motlakase. Ka lebaka lena, ke ntho e sa makatseng hore re o sebelisa ntle le ho se nahane mathata a ka bakoang ke ho o sebelisa hampe, 'me oa hlahisa batho **kotsi** kapa hona ho ba bolaea.



Lekhotla la Taolo ea Motlakase le Metsi Lesotho (LEWA)
le na le boikarabello ba ho hlokomelisa sechaba ka tšebeliso e mpe ea motlakase le bokotsi ba oona.



Tataiso mabapi le ho aha haufi le thepa ea metsi le motlakase

Lekhotla la Taolo ea Motlakase le Metsi Lesotho (LEWA) le tsoanela ho beha basebelisi ba thepa ea motlakase, metsi le likhoere-khoere leseling ka mehato ea polokeho eo ba lokelang ho e nka ka nako tsohle mabapi le thepa ea motlakase le metsi.

Sena se kolla litokomaneng tsa Lipehelo tsa Boleng ba Litšebeliso tse okang matla Likhaolong tsa 22(1) (c), 22(1) (e) le 22(1) (q) tsa Molao oa LEA oa 2002 o hlomathisitsoeng (LEA Act as amended).

Lekhotla le hlokometse sekhahla se phahameng seo matlo a ahoang ka sona holim'a kapa pela marang-rang a motlakase, metsi le likhoerekhoere naha ka bophara. Tloaelo ena e beha sechaba hammoho le liphoofolo tsietsing.

Lekhotla le etsa khoelehetso ho sechaba hore pele se ka aha kapa ho eketsa matlo, se etse likopo tse joalo ho Lekhotla la Motse Moholo Maseru (MCC) kapa

Liofising tsa Babusi ba Litereke naha ka bophara.

Kopo ea ho aha e thusa litsi tsa phano ea litšebeliso ho netefatsa hore marang-rang a phano ea litšebeliso ha a haufi haholo le moo tšebetso e tlo etsoa teng.

Basebelisi ba thepa ba eletsoa ho hlokomela hore ho fumantšoa tokomane ea tumello ea kaho ha ho bolele hore ba se ba ka aha haufi le marang-rang a litšebeliso. Moaho o ntsoa lokela ho ba limithara tse tharo ho tloha lipeiping bakeng sa metsi. Thepeng ea motlakase ho lokela ho siuoa bonyane limithara tse robeli, motlakaseng oa matla a 11-22 kV.

Ho se ikamahanye le lipehelo tsa tumello ea kaho, ho ka liehisa phano ea litšebeliso, ho phahloha hoa lipeipi tsa metsi/likhoerekhoere kapa hona ho chesoa ke motlakase. Ho latela sekhahla seo kotsi e ka etsahalang ka sona, seo se ka timetsa maphelo le ho baka tšenyho thepeng □



Moaho tlasa marang-rang a LEC.

LEWA e abela baithuti ba ipabotseng ba NUL le Lerotholi Polytechnic likhau

Mekete ea likapeso tsa selemo sa bo 23 oa Sekolo sa Lerotholi (Fokothi) le sa oa bo-43 oa Sekolo se Seholo sa Sechaba (NUL) e neng e tsoeroe ka la 13, 22 le 29 Mphalane 2018 ka ho latellana e ke ke ea tloha mehopolong ea baithuti ba selemo sa 2017/18. Ka moea o holimo oa thabo, likeleli li ne li keketla marameng a barutuo, ha melilietsane le menyakoe e ne e le lelomolo la letsatsi.

E le ho phethahatsa Tokomane ea Tumellano ea Tšebetso (MoU) e ileng ea tekeneloa ke litsi tse boletsoeng ka holimo tsa thuto le Lekhotla la Taolo ea Motlakase le Metsi Lesotho (LEWA), Lekhotla le ile la e ba teng 'mokateng oa likapeso e le ho ilo aba likhau ho baithuti ba ipabotseng lithutong tsa bona.

Sekolong se Seholo sa Sechaba LEWA e ile ea aba likhau tse tharo (3) ho ba ipabotseng hantle e leng Monghali Sello Sejake lefapheng la Science in Physics/Electronics, ho Mofumahatsana Nthabiseng Zolase, lefapheng la Biology le Chemistry hammoho le Monghali Lehlohonolo Mantsi, lefapheng la Economics.

Mookameli oa Sekolo se Seholo sa Sechaba, Motlotlehi Letsie III, o ile a beha puo ea mantlha ea ho tlotlisa mokete oa likapeso oa bo-43 oa kabo ea likhau le mangolo a thuto Roma.

“Joalokaha re tlotla leho keteka 'moho le lona katleho ea lona, re hloka ho le hopotsa hore naha ena e hloka ka tieo boetapele ba 'makhonthe bo sebetsang ka nnete, tsotello le morolo”, Motlotlehi Letsie III a rialo.

Mokateng oa Sekolo sa Lerotholi ona ho ne ho le teng baeti ba boemo bo holimo ba kang Letona la Thuto le Koetliso, Assoc. Prof. Ntoi Rapapa. Sekolong sa Lerotholi, Lekhotla le ile la abela Mofumahatsana Nthabiseng Mokhethe khau e le eena feela ea ipabotseng ka ho tsoteha lefapheng la Metsi le Motlakase.

Lekhotla le fana ka likhau tsena e le ho khothatsa le ho akofisa boipabolo lithutong lefapheng la Metsi le Motlakase, Lesotho. Baithuti bana ba ipabotseng ba ile ba fuoa chelete e kaalo ka M5000.00.

Ketekelo tsena li entsoe boteng ba batsoali, Bookameli ba likolo tse ling tse kholo ka hara naha hammoho le baemeli ba linaha tsa machaba ba phelang Lesotho.

Mokateng oa likapeso tsa Fokothi, LEWA e ne emetsoe ke Ofisiri ea Baji (CAO), Mofumahali 'Machabalala Koatsa ha likapesong tsa NUL teng, LEWA e ne emetsoe ke Ofisiri ea Liphatlalatso le Likamano tsa Sechaba (PRO) e leng Monghali Sebusi Khanyela



Raliphatlalatso oa LEWA, Mr. Sebusi Khanyela (oa bobeli letsong le letona) hammoho le baithuti ba ipabotseng ba NUL.

Lintlha tsa phano ea boleng ba litšebeletso limmokeneng tsa sechaba

Lekhotla la Taolo ea Motlakase le Metsi Lesotho (LEWA) le ikemiselitse ho fihlela Chebelopele ea lona ea ho ba setsi sa taolo ea boemo ba machaba, se akofisang phano ea litšebeletso e khonehang, ea moshoelella le boleng bo holimo ba litšebeletso ka puisano e mofuthu ho bohle ba amehang.

LEWA e bona ho le bohlokoa ho fumana lintlha tse amanang le phano ea boleng ba litšebeletso mabapi le litsi tse laoloang ke eona. Ho kopana le sechaba ho thusa LEWA ho tseba le ho utloisisa litlhoko tsa basebelisi ba litšebeletso ho ea ka Phano ea Boleng ba Litsebeletso (QoSSS).

Ka limmoka tsa sechaba le li-ea-le-moea, Lekhotla le e ba sehlohlolong sa litlhoko tsa basebelisi ba litšebeletso le mokhoa oa tharollo holima tsona.

Ho tsoa literekeng tsa Qacha's Nek le Thaba-Tseka, Lekhotla le fumane lintlha tse latelang 'me tseo li ileng tsa rarolloa/arabeloa ke litsi tse boliseng ba Lekhotla.

A. Liqholotso tsa basebelisi ba litšebeletso setereng sa Qacha's Nek:

1. **Sewage e lulang e phalla ka hará toropo.** Bookameli ba WASCO seterekeng bo ile ba bolella sechaba hore bo se ntse bo rarolla bothata boo hammoho le mokonteraka ea abetsoeng mosebetsi oa ho hula matloana.
2. **Tšebetso e monyebe ea katoloso ea metsi a hloekileng metseng ea toropo.** WASCO e ile ea hlolosa hore maputulo a ho ntlafatsa khokelo ea metsi e tlo etsoa ka porojekeea Five-Towns, e tlo tsoela le setereke sa Qacha's Nek molemo.
3. **Mabone a seterateng a sa sebetseng.** LEC e ile ea hlolosa hore ha se boikarabello ba eona ho bonesa li-street lights empa ke ba Lekhotla la toropo ka kotloloho.

4. **Tlhokahalo ea motlakase motseng oa Liqalabeng.** LEC ile ea hlolosa hore ha e ikarabelle morerong oa phano ea motlakase mahaeng 'me eona ke setsi feela se etsang mosebetsi bakeng sa mereo ea 'Muso oa Lesotho. LEWA e ile ea hlolosa sechaba hore eona ke 'moloki feela oa letlole leo la phano ea motlakase metseng. 'Muso oa Lesotho ka Lekala la Matla le Bolepi ke ona le etsang qeto ea hore metse e tla una molemo khokelong ea motlakase ke efe.

5. **Ho khaoha khafetsa hoa motlakase.** LEC e ile ea hlolosa hore ho khaoha hoa motlakase Qacha's Nek ho bakoa hangata ke senngoa hoa thepa ea motlakase ke sechaba sa Matatiele. 'E ile ea eketsa ka hore 'Muso oa Lesotho o morerong oa ho etsa phephelo ea motlakase ho tloha Maseru ho ea feta Semonkong. Hape, 'Muso o ntso sheba mekhoea eo ka eona e ka tsosolosang setsi sa phephelo ea motlakase sa Tsoelike.

B. Liqholotso tsa basebelisi ba litšebeletso setereng sa Thaba-Tseka:

1. **Monko o mobe ho tsoa matamong a sewage.** WASCO e hlalositse sechaba hore e bile le khahello ea lichelete tse ileng tsa e sitisa hore matamo ao a hloekiso. 'Hang ha chelete e ba teng, eile ea etsa tlhoekiso e joalo kahara setereke.
2. **Ho khaoha khafetsa hoa motlakase Labone la beke e 'ngoe le e 'ngoe le tlhokahalo ea metsi.** LEC e ile ea hlolosa hore ho khaoha ha motlakase ho bakoa ke ntlafatso ea marang-rang a fepelang setereke. Khakanyo ke hore tšebetso e tla phetheloa ka 'Mesa 2019. Tlhokahalang ea metsi, WASCO e ile ea hlalosa hore metsi a eona a pompoua ka motlakase 'me ha motlakase o le sieo, seo se thefula boemo ba metsi litankeng, ho se keketseho ea oona ho fihlela motlakase o khutlile. WASCO e itse e na le litanka tse nyane hoo li ke keng tsa fepela sechaba ka metsi letsatsi lohle.



Mr. Selongoana Selongoana nakong ea 'moka oa sechaba oa WASCO le LEC, Thaba-Tseka.

3. Palo e ngata ea sechaba se ahang tlasa lithapo tsa matla a maholo a motlakase. LEC e boletse hore ho na le bothata bo jeleng setsi ba batho ba ahang matlo tlas'a lithapo tsa motlakase tsa matla a maholo Thaba-Tseka. K'hamphani ea tsoela pele hore mang kapa mang ea batlang ho aha, o lokela hoe a etsa kopo ea ho aha (Building permit) mafapheng a fanang ka tumello ea molao e le Setsi sa Kabo ea Mobu (LAA) Maseru kapa liofising tsa Babusi ba Litereke. Ka lehlakoreng le leng, WASCO le eona e ile ea hlolosa hore e thulana le bothata bo tsoanang ba sechaba se ahang holim'a marang-rang a eona.
 4. **Mekoloto ea metsi e sa ngolloeng litlankaneng.** Basebelisi ba litšebeletso ba ile ba hlalosa hore ha ba sa romelloa lipampiri tsa mekoloto (bills) empa li-SMS tseo e leng hore li baloa haholo ke bacha ba sebelisang lifono-fono. WASCO ile ea hlolosa hore e se e hlokometse sello seo ho phatlalla le naha 'me batho bohle ba batlang ho bona bill tsa bona, ba kope ho li ntšetsoa (printout) liofising tsa WASCO naha ka bophara.
 5. **Lintlha kholo tseo LEWA e li shebang nakong ea tekolo ea litefiso.** Lekhotla le ile la hlalosa sechaba hore le sheba lintlha tse amanang le moruo le sechaba, libuka tse hlahlobiloeng le hore na Kopo e na le mabaka a utloahalang hape le maikutlo a sechaba.
 6. Ho lutla hoa sewage ka hará toropo, haholo-holo Sekolong sa Koetliso ea Litichere (LCE). WASCO eWASCO e hlalositse hore e se e buisane le bookameli ba LCE ka boemo boo hore bo fengoa joang 'me e tla boela hape e khutlela ho bookameli boo, ho utloa hore na ba hakae ka ho phethahatsa seo ho lumellaneng ka sona.
 7. **Tsela ea ho teka ea litletlebo seterekeng sa Thaba-Tseka ho LEWA.** Sechaba se ile sa hlalositsoa hore se ka isa litletlebo ka mongolo ofising ea 'Musi oa Setereke, eo eena a tlang ho finyelletsa lengolo le joalo ho Lekhotla. Sechaba se ile sa boela sa bolelloa hore komiti ea LEWA ea Thaba-Tseka le eona e boemong ba ho ba thusa.
 8. **Mekhoa eo LEWA e etsang ho lisa hore meoloane ea Phano ea Boleng (QoSSS) ba Metsi le Motlakase ea lateloa.** Lekhotla le ile la bolella sechaba hore le netefatsa tšebeliso ea QoSSS ka mekhoha e kang litlhahlobo litsing tse laoloang ke Lekhotla, liraporoto tsa tlaleho ea mosebetsi hammoho le litletlebo tsa basebelisi ba litšebeletso.
- Lipitsong tsena, Lekhotla le ne le emetsoe ke Ofisiri ea Likamano le Sechaba (Monghali Sebusi Khanyela), Ofisiri ea Litaba tsa Baji (Mofumahali 'Machabalala Koatsa) le Ofisiri ea Tlhahlobo ea Metsi (Mofumahali 'Mamathe Makhaola) □

Methati e lateloang ke LEWA ho rarolla litletlebo

Tšebetso engoe ea Lekhotla la Taolo ea Motlakase le Metsi Lesotho (LEWA) ke ho sireletsa litabatabelo tsa basebelisi ba metsi le motlakase ka ho rarolla litletlebo tse hlahang lipakeng tsa bona le ba fanang ka litšebeliso (K'hamphani ea Motlakase Lesotho le K'hamphani ea Metsi le Likhoere-khoere.

Taba ea bohlokoa ke hore litletlebo li ka fitisetsoa ho LEWA ha feela li hlotsoe ho rarolloa ke methati ea tharollo ea litletlebo ea litsi tsa phano ea litšebeliso. Moelelo ke hore li rarolloe ka potlako e ka khonehang.

E le ho atlehisa morero oa LEWA oa ho rarolla litletlebo ka potlako, Lekhotla le itšetlehile ka khaolo ea 34 le 36 ea Molao o thehileng Lekhotla. Lekhotla le boetse la hlalalisitokomane tsa Boleng ba Phano ea Litšebeliso (QoSSS); Litokomane tsa Molao oa Lekhotla la Taolo ea Motlakase oa Tharollo ea Litletlebo oa selemo sa 2010 le Molao oa Lekhotla la Taolo ea Motlakase le Metsi oa Tharollo ea Litletlebo tsa Metsi le Likhoerekhoere oa selemo sa 2013. molemong oa tharollo ea litletlebo. Litokomane tsena li fana ka tataiso ea methati e lokelang ho lateloa ke tharollong ea litletlebo.

Joalo ka ha ho hlakisitsoe liratoaneng tse ka holimo, tharollo ea litletlebo ka potlako ke mokhoa oa tšebetsooa Lekhotla. Litletlebo li lokela ho ikamahanya le tšebetso e tlasa taolo e le hore tletlebo e joalo e be boemong baho rarolloa ke Lekhotla. Ka ha 'moko-taba oa litletlebo tse fapaneng o ka fapana, sena se susumetsa LEWA hore le atamele litletlebo ka mekhoha e fapakaneng e le ho fihlela tharollo.

Basebelisi bohle bana le tokelo ea ho hlalisa litletlebo tsa bona ka pele ho LEWA, empa tlhokomeliso ke hore tletlebo e lokela e be e kile ea hlalisoa pele setsing sa phano ea litšebeliso. Sena se fa setsi sa phano ea litšebeliso monyetla oa ho rarolla litletlebo ka potlako. Lekhotla le boetse le hlohonolofalitse Methati ea Tšebetso ea Tharollo ea Litletlebo tsa Motlakase 'me tokomane e joalo e ntse e lokisoa ke WASCO litabeng tsa tharollo ea litletlebo tsa metsi le likhoerekhoere.

Litsi tsa phano ea litšebeliso ho lebelletsoe hore li

rarolle litletlebo ka tsela e nang le ponaletso 'me e le ka tsela e khotsofatsang basebelisi e bile e ikamahantse le lakesense le melao ea taolo. Moo e bang molli o bona tletlebo ea hae e sa rarolloa ka tsela e khotsofalong kapa e be ha e ea rarolloa hohang, Lekhotla le ka atameloa 'me la kena lipakeng.

Lekhotla ha le se le fumane tletlebo, tse latelang li ea hloka hahala e le ho hlahloba hore na tletlebo e feela e ikamahanya le tšebetso ea LEWA:

- Lebitso la molli/moji;
- Aterese kappa moo molli a phelang teng;
- Linomoro tsa fono;
- Tletlebo le tharollo e lebeletsoeng;
- Likopi tsa litokomane tse fitisetsanoeng ke mosebelisi le mofani oa litšebeliso.

Boemong boo eleng hore tletlebo e ikamahanya le tšebebo e tlasa taolo, e ba lipatlisiso li tla etsoa moo ho hloka hahlang. Setsi seo tletlebo e hlahileng ka lebaka la eona se lokela se tsebisoe ka tletlebo e joalo 'me lehlakore la eona la litaba le fumanoe. Ha e ba ho hlakile hore tletlebo e rarollotsoe, LEWA e ba e tla koala tletlebo e joalo.

Haeba lehlakore ka leng le tsitlalletse lehlakoreng la teng la litaba tletlebong ea bona, Lekhotla le ka ba bitsetsa kopano ea bokena lipakeng (mediation). Ha ho etsahala hore mahlakore a fihlele tumellano e itseng, LEWA e lokela ho koala tletlebo, empa moo tumellano e sa fihleloeng, tletlebo e fitisetsoa Botong ea LEWA ho fana ka tharollo ea moshoelella. Tharollo eo ea LEWA e ntse e ka fitisetsoa makhotleng a molao ke lehlakore le sa khotsofallang tsela eo qeto e fihletsoeng ka teng.

Ka methati ena ea tharollo ea litletlebo, Lekhotla lefa setsi sa phano ea litšebeliso monyetla oa hore litletlebo li tekoe teng pele. Tletlebo e ke ke ea fitisetsoa ho LEWA e sa ka ea feta setsing sa phano ea litšebeliso ntle le ha e le maemo a tlokotsi. Khopotso e ngoe ke ea hore LEWA ha ena matla a ho rarolla litletlebo tsa lipuseletso le tse amanang le tseko ea mobu empa le sebetsana le litaba tse amang litšebeliso



Seabo sa LEWA leanong la naha la tsa metsi le likhoerekhoere

Ho latela Khaolo ea 7 ea molao oa Lekhotla la Motlakase le Metsi Lesotho oa 2011, o hlomathisitsoeng o mong oa mosebetsi oa Lekhotla ke ho hlalisa, ho hlalloba le ho netefatsa hore lipehelo le melaoana ea boleng ba phano ea litšebeliso tsa metsi le likhoerekhoere li kena tšebetsong hantle.

Lekhotla le boetse le lokela ho kenya letsoho litabeng tsa katoloso ea marang-rang a metsi le likhoerekhoere.

E le ho fihlela tšebetso e boletsoeng ka holimo, Lekhotla le lokela ho ikamahanya le melao le melaoana ea naha ea Lesotho joaloka Molao oa Metsi le Likhoerekhoere oa 2007 (Lesotho Water and Sanitation Policy 2007), le meoloane e meng.

Ho latela molao ona oa metsi le likhoerekhoere, 'muso o hatella tabeng ea hore mehloli ea metsi e sebelisoa ka tsela e bolokehileng ba keng sa meloko etlang, ho hlokomela hore litšebeliso tsa metsi li fumaneha nako eohle le ho bona hore litaba tsa bohloeki litabeng tsa likhoerekhoere li eloa hloko.

Moelelo oa molao ona oa 2007 oa metsi le likhoerekhoere, ke ho bona hore hona le taolo ea polokeho ea mehloli ea metsi, e le ho khotsofatsa litaba-tabelo tsa basebelisi ba kajeno le ka moso.

Ka kakaretso, meoloane le lipolelo tsa LWSP li kenyeletsa taolo ea mehloli ea metsi, phephelo ea metsi le litšebeliso tsa likhoerekhoere, tikoloho, ho kenyeletsa sechaba litabeng le liqetong tsa litaba tsa metsi, tlhopho ea mafapha le melao.

Litokomane tsa metsi le likhoerekhoere li hlalhisitsoe ho ipapisitsoe le molao ona oa 2007 le melaoana e meng ea naha.

Ka hara tse ling, tokomane ena ea tsamaiso ea LWSP e hlakisa tse latelang:

- Basotho bohle ba lokela ho fumana phephelo e tsitsitseng ea metsi le litšebeliso tsa likhoerekhoere ka litjeo tse amohelhang, 'me sena se lokela se ikamahanye le meoloane ea naha ka kakaretso;
- Kaha metsi ke bophelo, taolo ea 'ona e lokela e be e akaretsang, e kopanyang ntlafalo ea bophelo ba motho le tikoloho;
- Ha ho laoloa kapa ho sebetsanoa le litaba tsa metsi, ho lokela ho kenyeletsoe bohle ba amehang, e ka ba basebelisi, ba rerang, mafapha a ikemetseng le mafapha a 'muso a hlalhisang melao le melaoana le sechaba ka kakaretso. Taba ena ea ho kenyelletsa mafapha a mang e susumetsa hore liqeto li fihleloe ho kenyelletsoe maikutlo a bohle ba amehang;
- Ho lokeloa ho phahamisoe taba ea ho tsetela ha ho sebetsanoa le marang-rang a metsi. Taba ena e tla thusa hore ho fihleloe tlhoko ea metsi ka hare ho naha;
- Lekhotla la Taolo ea Motlakase le Metsi Lesotho lona le lokela le laola litjeo tsa metsi le litšebeliso tsa likhoerekhoere e le ho thusa ka hara tse ling ho bona hore litjeo li ba teng tsa ho fana ka litšebeliso; hape
- Ho lokela ho be le tsoelopele ea ho bopa le ho ntlafatsa mafapha le karolo ea metheo ea molao e le ho kenya LWSP tšebetsong

Thuto ka tsa phepelo ea motlakase metseng

Ho latela molao oa Lekhotla la Taolo ea Motlakase oa Kopo ea lilakesense oa 2012, (Lesotho Electricity Application for licences Rules, 2012) mokopi a ka fuoa lengolo la tumello kapa lakesense ea ho fehla motlakase, ho o tsamaisa ka marang-rang, ho pharalatsa, ho fepela le ho reka kapa ho rekisetsoa motlakase hotsoa kante ho naha.

Le ha ho le joalo, Lekhotla la Taolo ea Motlakase le Metsi Lesotho (LEWA) le ka fana ka tumello ea hore motho kapa lefapha le sebetse ntle le ho latela litaba tse laolang lilakesense maamong a itseng feela.

Lefapha la matla ke mohlala oa boemo bo hlalositsoeng ka holimo, 'me lefapha lena le sebetse kante ho meoloane e tloaelehileng la lilakesense. Monyetla ona oa tšebetso ena ke o entseng hore tšebetso ea liporojeke tsa mathomo tsa ho atolosa marang-rang ho tloha ka 2007 e tsoele pele. Lengolo lena la tumello ea ho etsa tšebetso ena ea liporojeke le ile la eketsoa nako ka la 30 Loetse, 2018. Morero o moholo oa tšebetso ea Lefapha la Phepelo ea Motlakase Metseng (REU) ke ho kenya tšebetsong leano la ho fepela motlakase metseng 'me le etse meralo ea nakoana le ea nako e telele. Kaha REU e tlasa taolo ea LEWA, Lekhotla le lokela ho hlahlola tšebetso ea lefapha lena, 'me le bone hore le sebetse le ipapisitse le liphelelo tsa taolo, le ha ele ka tsela e bobebe.

REU e na le baji ba bane lefapheng la khoebo 'me bona ke (i) litora tse peli tsa marang-rang a phetiso ea melaetsa e Qholaqhoe le Ha Sekake, (ii) Sepetlele sa

Tebellong le (iii) Tleleniki e Dilli-Dilli/Sixondo. Marang-rang a Qholaqhoe le Ha Sekake a fuoa motlakase oa 33kV ke K'hamphani ea motlakase Lesotho (LEC), ha marang-rang a Dilli-Dilli/Sixondo e fuoa motlakase oa 22kV ke ESKOM ea Afrika boroa.

Ka kakaretso, tšebetso ea mantlha ea REU ke ho phahamisa moruo oa naha libakeng tse thoko ho literopo 'me sena se fihleloa ka ho khothaletsa tšebeliso e nepahetseng ea motlakase; ho hlalisa le ho boloka boemo bo nepahetseng ba marang-rang a motlakase; ho hloaea le ho thusa sechaba ho etsa boikopanyo (Schemes) boo ka hona ba ka thusoang ho kenyetsoa motlakase; ho netefatsa hore motlakase o fetela sechabeng ka tsela e bolokehileng 'me ebile litšebeliso li fumaneha ka linako tsohle.

Libaka tse hloailoeng e le tse kante ho teropo ke tse hlahisitsoeng ka kaseteng ea 'muso, 'me libaka tse ka thoko le moo LEC e ka fanang ka litšebeliso le tsona li hlakile ka hara tokomane ea kasete. REU e lokela hape ho atolosa phepelo ea motlakase ka linoko tse mashome a mahlano lekholong 50% ka 2020, hape e laole khakolo ea phepelo ea motlakase metseng.

Ka nako ea ho fepela motlakase, Lefapha la Matla le Bolepi le hloaea metse e lokelang ho kenyetsoa motlakase. Lekhotla e le setsi se bolokang kapa ho hlokomela hore letlole la phepelo ea motlakase le bolokehile hantle, e ba le tla koptjoa ho lokolla litjeo tse itseng e le ho tsoellisa pele tšebetso ea ho pharalatsa phepelo ea motlakase metseng e seng e khethiloe □



Nonyo ea maikutlo a baji ba motlakase o ka ntle ho toropo, Quthing-Sixondo.



LEWA e ketekela matsatsi a Christmas

Ebile le thabo le monyaka ha Lekhotla la Taolo ea Motlakase le Metsi Lesotho (LEWA) le ne le ketekela matsatsi a phomolo ea Christmas 'Melesi Lodge. Basebetsi ba ile ba otlolla mmele ka 'mino oa house hammoho le lino mapholi ka mefuta ea tsona.

Ketekelo e bile ka la 13 Tšitoe 2018, e le letsatsi le neng le etella la ho koala.

Haa ne a buoa moketeng, Mookameli oa LEWA,

Professor Lebohang Moleko o ile a leboha basebetsi ka boitelo le boikitlaetso boo ba bileng le bona nakong ea selemo ha ba etsa mesebetsi ea bona.

O ile a lebisa litakaletso ba keng sa matsatsi a phomolo le mahlohonolo ba keng sa selemo sa 2019.

Kamora'o ho moo, o ile a phatlalatsa mokete o butsoe se molao, 'me keteko eile ea qala ka thabo e kholo. Basebetsi ba ile ba bontša bokhoni ba bona ba ho roba letheka ka menyakoe, e kang *fosho* ▣



Basebetsi ba LEWA ketekelong ea Keresemese, Mmelesi Lodge.



U tšoenyehile ka
phepelo ea metsi?

Qala ka ho teka tletlebo ea hau WASCO e le hore ho...

**Rarolla
bothata**

Ha WASCO esa rarolle tletlebo ea hau,
u ka e fetisetsa LEWA.

*E meng ea metsebetsi ea Lekhotla Lekhotla la Taolo ea Motlakase le Metsi Lesotho (LEWA)
ke ho rarolla litlelebo tsa sechaba mapabi le litsi tse tlasa taolo ea lona
(Water and Sewerage Company - WASCO or Lesotho Electricity Company-LEC).*

Ho fumana tlhakisetsa e felletseng, ikopanye le rona: 7th Floor, Moposo House, Kingsway, Maseru, Lesotho

Tel: +266 22 312479 • Fax: +266 22 315094 • Email: secretary@lewa.org.ls

